

## SUL CYFFREDIN 9

GENESIS 24:34-38, 42-49, 56-67; SALM 45:10-17;  
CANIAD SOLOMON 2:8-13;  
RHUFEINIAID 7:15-25A; MATHEW 11:16-19, 25-30

---

---

### ● Gweddi agoriadol

Cawn ein tynnu i'r lle hwn,  
i lecyn cysegredig,  
yn deulu gyda'n gilydd,  
croesawu dieithriaid,  
rhannu cymdeithas,  
a chyflwyno ein bywyd mewn gwasanaeth.

Cawn ein tynnu i'r lle hwn,  
i lecyn cysegredig,  
i'th addoli di, ein Duw.

### ● Moliant

Nid i'r cyfoethog a'r enwog,  
y pwerus,  
y deallus,  
y dylanwadol,  
yr ymddiriedaist dy air,  
ond i bysgotwyr,  
pobl yr ymylon a phechaduriaid,  
pobl gyffredin fel ni.

Ac i bobl gyffredin fel ni  
datguddiaist bethau'r nef,  
er mwyn i ninnau hefyd  
fod yn gludwyr newyddion da.  
Felly molwn di, Arglwydd,  
am y datguddiad  
a neges dragwyddol dy iachawdwriaeth.

### ● Cyffes

Dymunwn dy wasanaethu –  
dangos dy gariad  
ble mae'n hawlio cael ei ddangos;  
a bod yn gyfrwng dy gyffyrddiad  
i wneud bywydau'n gyflawn;  
llefaru dy air  
wrth y rhai sy'n gwadu dy rym;  
dal dy olau  
a denu eraill at dy orsedd.  
Ac eto, cyffeswn  
ein harafwch i ynganu dy enw,  
a themtir ni yn ddyddiol  
i wrando ar lais y byd hwn,  
a gwyddom nad yw ein bywydau  
yn adlewyrchu dy sancteiddrwydd.

Felly, eto,  
down atat yn wylaidd  
gan gyhoeddi mewn ffydd,  
'Boed diolch i Dduw,  
sy'n maddau i ni a'n hadnewyddu,  
drwy Iesu Grist ein Harglwydd!'

● **Diolch**

Pan fo'r siwrne  
yn ymddangos yn hir,  
nerth yn pallu  
a ninnau yn baglu,  
fe'n codi ar ein traed,  
    ein hadfywio,  
    ein calonogi  
    a rhannu ein baich.

Arglwydd grasol,  
ein cydymaith ar y ffordd,  
arweinydd diogel  
ar hyd llwybrau bywyd,  
am dy bresenoldeb,  
dy rym a'th gymorth,  
rhown ddiolch i ti heddiw.